

摘藻堂四庫全書薈要

集部

欽定四庫全書薈要

集部

松雪齋集卷二

臣董誥詳校
詳校官助教臣謝登雋



欽定四庫全書薈要

松雪齋集目錄

卷一

賦

卷二

五言古詩

卷三

五言古詩



七言古詩

卷四

五言律詩

七言律詩

卷五

七言律詩

絕句

卷六

雜著

序

卷七

記

碑銘

卷八

碑銘

卷九

碑銘

卷十

制

贊

銘

題跋

樂府

卷末

外集

臣等謹案松雪齋集十卷外集一卷元趙孟頫撰孟頫字子昂宋太祖之後以秀王伯圭賜第湖州故為湖州人孟頫年十四以父蔭入仕宋亡家居會程鉅夫訪遺逸江南以孟頫入見世祖大喜即授兵部郎中累官翰林學士承旨得請歸卒追封魏國公諡文敏事蹟具元史本傳楊載作孟頫行狀稱所著有

松雪齋詩集而世所行明萬厯間江元禧所

編松雪齋詩集寥寥數篇並非足本惟焦竑

經籍志載孟頫集十卷與此本目次相合而

史所稱琴原樂原得律呂不傳之妙者檢勘

均在其中外集雜文十九首亦他本所未載

蓋全帙也孟頫以宋室宗臣膺元撫仕深為

物論所譏觀其和姚子敬韻詩有同學故人

今已稀重嗟出處寸心違之句是晚年亦不

免於自悔然風流文采冠絕當時陶九成輟

耕錄稱其岳鄂王墓詩為世所膾炙蘇天爵

元文類亦錄其詩至二十餘首蓋其清邃俊

逸妙近自然實能苞孕古人動得天趣不但

翰墨為元代第一即其文章亦足厠跡虞楊

范揭之間不容以書畫相掩矣集前有戴表

元序見剡源集中末題大德戊戌歲蓋孟頫

自汾州知州謁告歸里時裒集所作而請表

元序之者也乾隆四十二年四月恭校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

松雪齋集原序

吳興趙子昂與余交十五年凡五見每見必以詩文相振激子昂才極高氣極爽余跂之不能及然而未嘗不為余盡也最後又見於杭始大出其平生之作曰松雪齋詩文集者若干卷屬余評之余惟人之各以其材自致於世必能相及也而後相知必相知也而後能相為言余於子昂不相及而何以知何以言乎子昂曰雖然必言之余曰必言之則就吾二人之今所歷者請以杭

喻浙東西之山水莫美於杭雖兒童婦女未嘗至杭者知其美也使之言杭亦不敢不以為美也而不如吾二人之能言何者吾二人嘗身歷而知之而彼未嘗至也他日試以其說問居杭之人則言之不能以皆一彼所取於杭者異也今人之於詩之於文未嘗身歷而知之而欲言者皆是也幸嘗歷而知之而言之同者亦未之有也子昂未弱冠時出語已驚其里中儒先稍長大而四方萬里重購以求其文車馬所至填門傾郭得片紙

隻字人人心愜意滿而去此非可以聲色致也而子昂
豈謂其皆知我哉故古之相知者必若韓孟歐梅同聲
壹跡綢繆傾吐而後為遇而後世乃欲望此於道途解
后之間則又過矣余評子昂古賦凌歷頻迅在楚漢之
間古詩沈涵鮑謝自餘諸作猶傲睨高適李翱云子昂
自知之以為如何大德戊戌仲春既望剡源戴表元叙

欽定四庫全書薈要卷一萬六千二百八十五

集部

松雪齋集卷一

元 趙孟頫 撰

賦

吳興賦

猗與休哉吳興之為郡也蒼峰北峙羣山西迤龍騰獸
舞雲蒸霞起造太空自古始雙谿夾流繇天目而來者
三百里曲折委蛇演漾漣漪東為碕灣匯為湖陂泓渟

皎澈百尺無泥貫乎城中繚於諸毗東注具區渺渺潏
潏以天為隄不然誠未知所以受之觀夫山川暎發照
朗日月清氣焉鍾沖和攸集星列乎斗野勢雄乎楚越
神禹之所底定泰伯之所奄宅自漢而下往往開國洎
晉城之攬秀據實沿流千雉面勢作邑是故歷代慎牧
必掄大才選有識前有王謝周虞後有何柳顏蘇風流
互映治行同符皆所以宣上德意俾民懽娛況乎土地
之所生風氣之所宜人無外求用之有餘其東則塗泥

膏腴畝鍾之田宿麥再收杭稻所便玉粒長腰照宮及
箱轉輸旁郡常無凶年其南則伏虎之山金蓋之麓浮
圖標其巔蘭若棲其足鼓鐘相聞飛甍華屋衡山絕水
魯史所錄盤紆犬牙陂澤相屬蒹葭孤盧鷄頭荷華菱
苕鳬茨荏蒲軒于四望弗極烏可勝數其中則有魴鯉
鰮鱮鰕頭白小鱸鰕膾餘黿鼉龜鼈有蛟龍焉長魚如
人歟浪生風一舉百鈞漁師來同罔罟笊簍罩汕是工
鳴榔鼓枻隱然商宮巨細不遺噦噦喁喁日亦無窮其

西則重岡複嶺川原是來其北則黃龍瑤阜之洞玲瓏
長壽之塢縣水百仞既高且阻磴研嶽崱歲磊砢怪
石萬數旅乎如林其高陵則有楊梅棗栗櫨梨木瓜橘
柚夏孕枇杷冬華槐檀松柏椅桐梓漆之屬文竿綠竹
篠簜雜遰味登俎豆材中宮室下逮薪樵無求不得其
平陸則有桑麻如雲郁郁紛紛嘉蔬含液不蓄長新陸
伐雉兔水弋鳬雁舟楫之利率十過半衣食滋殖容容
行行既樂且庶匪教伊慢於是有搢紳先生明先聖之

道以道之建學校立庠序服逢掖戴章甫濟濟多士日
躋於古迺擇元日用量幣尊玄酒陳簠簋選能者秉周
禮贊者在前獻者在後雍容俯仰周旋節奏成禮而退
神人和右當是之時家有詩書之聲戶習廉恥之道辟
雍取法列郡觀效誠不朽之盛事已或者難曰自古論
著之士曷嘗不識人物紀風俗哉夫人才者濟時之具
而風俗者為治之質也今子徒摭摭細碎推比貨食高
談不切炫燿自飾莫大於斯二者顧乃略而弗錄雖文

奪組繡聲諧金石竊為子不取也僕應之曰否子獨不聞夫子之言乎十室之邑必有忠信今年且千載地且千里人物之富胡可殫紀史冊畢書可無贅矣若乃風俗之隆汙在為政者之所移易又弗可得而定著也夫吳雖介在江左嘗被至德之風矣且吾聞之風行而草偃日中而表正上行下效置郵傳命辟若季子為守言游為令以仁義為化禮樂為政鎮以不貪之寶喻以不言之信即刑可使不用俗可使益盛方將還敷朴於上

古考休祥於庶徵令美則美矣又可遂以為定乎於是
難者唯唯逡巡而失意

求友賦荅袁養直

思古人之不可見兮心鬱結而不舒登高丘而遠望兮
獨歎慨乎增歔波洋洋其汜濫兮欲濟而無航膏吾車
而孤往兮山鬱乎其蒼蒼四顧闐其寂寥兮思塞產而
不鑠采衆芳以自娛兮聊假日以愉樂蹇長洲之芙蓉
兮擎大澤之蘭茝擷江離之秀穎兮結秋蘭以為佩世

俗方尚同兮余獨異乎今之人謂蘭茝為不芳兮蛾眉
枉之以善姪衆不可以戶說兮歷年歲而覲閔變心以
從俗兮而吾又不忍徯朝陽之鳴鳳兮企空谷之白駒
何駑駘之衆多兮鸚雀紛其瞿瞿寧饑渴以需時兮恥
屬饜乎腥腐古道久其弗繼兮吾惕焉為此懼何美人
之好修兮獨與余其同心懷余以厚德兮遺余以好音
世固有同居而弗察兮何千里而能同亂淞江之滔滔
兮涉遠道以相從覲清揚之信美兮懷盛年而莫當子

濯足於東海兮晞髮乎扶桑吸沆瀣以為飲兮餐朝霞
以為糧披列星之粲爛兮抱明月之夜光駕青雲而高
馳兮鳴和鸞之鏘鏘擾蒼龍使挾輶兮服白虎以驅不
祥願發軔其勿亟兮聊弭節而抑志指黃昏以為期兮
夫孰遠而弗至亂曰鹿鳴呦呦猶求友兮曾謂斯人不
如物之知兮獨行無儔吾將與子為類兮

紈扇賦

炎暑時至陽鳥怒飛金石為流白汗沾衣候吹纖條延

爽南扉玉枕徒設桃笙安施菊皇躑躅不知所為於是
裂輕紈兮似雪製圓扇兮如月光搖懷袖涼生毛髮起
遐想於青蘋引清颼於天末蕭然襟帶淒其絺葛醒人
肌骨裨歆如脫須臾或離中腸為熱殆造物者欲解民
之愠假人力以為之不然豈天時之可奪也復有題詩
欣賞因書奇絕障輕塵以寄恨揚仁風而言別或畫乘
鸞之女或誤成蠅之筆白羽離襪而自愧蒲葵比方而
知劣及乎商氣應厥民夷玉露降兮百草金風生兮桂

枝羅衣重拂秋蘭復菲孤螢冷照寒螢暗啼葉捐篋筍
綢繆綢絲班姬形中道之怨江淹賦零落之詩嗟夫用
舍有時出處有宜惟人亦爾於物奚疑彼狐貉之御冬
豈當暑而亦悲苟行藏之任道願竢時乎安之伊聖賢
其不可見兮之二人又何知

修竹賦

猗猗修竹不卉不蔓非草非木操挺特以高世姿蕭灑
以拔俗葉深翠羽幹森碧玉孤生太山之阿千畝渭川

之曲來清飈於遠岑娛佳人於空谷觀夫臨曲檻俯清
溪色侵雲漢影動連漪蒼雲夏集綠霧朝霏蕭蕭雨沐
裊裊風披露鶴長歎秋蟬獨嘶金石間作笙竽雜吹若
乃良夜明月窮冬積雪掃石上之陰聽林間之折意參
太古聲沉寥泝耳目為之開滌神情以之怡悅蓋其婉
秀碧梧託友青松蒲柳慚弱桃李羞容歌籊籊於衛女
詠淇澳於國風故子猷吟嘯於其下仲宣息宴乎其中
七賢同調六逸齊蹤良有以也又况鳴嶰谷之鳳化葛

陂之龍者哉至於虛其心實其節貫四時而不改柯易
葉則吾以是觀君子之德

赤兔鵑賦

皇慶元年上賜大都留守臣拜特穆爾白兔鵑一
翎翮皓潔白雪同皎至延祐元年凡三籠而毛羽
變赤光采豔奕異於尋常搏擊勇鷙加於疇昔雖
老於五坊者亦不知其所以然豈若君子進於德
以潤身者耶公既寫其形質集賢侍讀學士臣趙

孟頫為之賦其辭曰

猗鷲禽兮出金門賜貴臣兮示殊恩
色霜雪兮耀前軒
解條鋌兮縱平原
狐兔駭兮不及奔
歷年歲兮毳如璫
粲晨霞兮炫朝暾
剛氣勝兮肆飛騫
德愈進兮義愈敦
炯雙眸兮睨乾坤

松雪齋集卷一

欽定四庫全書薈要卷一萬六千二百八十六

集部

松雪齋集卷二

元 趙孟頫 撰

五言古詩

古風十首

詩亡春秋作仲尼蓋苦心空言恐難託指事著以深大
義炳如日萬古仰照臨鳳鳥久不至楚狂乃知音愁來
不得語起坐彈吾琴

周衰有戰國紛紛極荆秦黃金聘辯士駟馬迎從人朝
為刻骨讐莫作歃血親終然智力屈奉身俱入秦

相如賦大人出語頗奇怪飄然凌雲意過耳誠一快誇
言入無際自覺塵俗隘安知翻成勸何用名為戒

自有天地來蓬萊幾清淺人生空皓首舉世誰得見瑤
臺在何許渺渺煙波遠方舟不可渡使我空展轉

絕代有佳人被服綺與紈螭眉秀聯娟吐詞馥若蘭清
歌啓皓齒瑤琴發哀彈一彈再三歎聽者涕汎瀾借問

誰家子為言本邯鄲

秋風吹庭樹故葉紛以墜明月耿夜長草蟲促經緯四
序苦不淹少壯何足貴展轉復展轉寤辟不能寐昔為
閨中秀今作市門鄙豈無膏與沐甘心得憔悴

山深多悲風日莫愁我心玄雲降寒雨松柏自哀吟人
生百年後奄然閟重陰念此每不樂天路何由尋仙人
偓佺輩逍遙在青岑奈何不爾思委命重黃金

海山有奇樹粲粲珊瑚枝由來植物性無脛可推移如

何石氏子樹之白玉墀洛陽經幾戰金谷久荒夷空令
千載下聞者為傷悲

烈風號枯條落葉滿周道原野何蕭索川流亦浩浩離
居日以遠懷思令人老功名會有時生世苦不早顧瞻
靡所騁憂心慙如擣

浮雲何方來不知竟安之飄飄隨風去汗漫以為期自
昔功名士往往事驅馳白駒空谷中誰能加繫維皎皎
難見容翻受世妍媸虛名誠無益不見斗與箕

有所思

思與君別來幾見芙蓉花
盈盈隔秋水若在天一涯
欲涉不得去茫茫足煙霧
汀洲多芳草何心采蘅杜
青鳥翔雲間錦書何時還
君心雖匪石祇恐彫朱顏
朱顏不可仗那能不惆悵
何如雙翡翠飛去蘭苕上

和子俊感秋五首

秋至倏廿日天宇豁然清
涼颼旦夕至林木發商聲
良辰不我與慨然心自驚
古人久已逝念之動中情
苦心

嬰世患只博身後名今我將無同庶復得此生

明月照北林翩翩棲鳥翻虛室當靜夜幸絕人事喧念
子已獨寐無人相與言吾生性坦率與世無競奔空懷
丘壑志耿耿固長存何由持此意往與嚴鄭論

披衣步中庭仰視河漢白寓形天地內聊復度朝夕仲
尼諒非愚皇皇不暖席履運有異同喟然慨今昔丘園
豈云遠終當期屏跡日月馳驚去鳥影飛過隙歸休盍
不早胡為受形役

晴雲暖高宇輕颺弄微涼天氣政爾佳撫已徒自傷今
日非昨日荏苒歎流光幾見春鳥鳴已復啼寒蟬一時
良亦短萬世則為長

白露泫然隊草木日以彫閒居無塵雜日薄風脩脩登
高寫我心葵扇欲罷搖感時俯逝水回睇仰層霄松喬
在何許高蹈不可招願言從之遊懷古一何遙

詠懷六首

皇天分四序寒暑互推移如何當秋夕愴怳令心悲寒

蟬寂無聲翔鴈紛南飛西風一披拂草木失華滋不惜
鷓鴣鳴但傷衆芳萎徘徊白露下鬱邑誰能知

美人涉江來遺我雲和琴朱絲絢玉軫古意一何深長
歌和清彈三歎有遺音逸響隨風發高高不可尋奈何
俚俗耳抑揚悅哀淫此道棄捐久沉吟獨傷心

明明秋夜月流光照羅帷隱憂從中來起視夜何其草
蟲催杼軸札札鳴聲悲良人遠行役萬里歸無期予髮
已曲局膏沐久不施迴身入閨房愁思當告誰獨有中

宵夢遙遙為君馳

蒼天高無極大川廣且深下有沉潛魚上有冥飛禽先
民莫不逸我獨懷苦心抒情作好歌歌竟意難任

陵茗何青青上蒙松與栢一時良亦好歲晚竟誰得人
無金石壽生年不盈百何為慕榮祿抱此長戚戚

菽粟在中原夫人能采之無為思百憂歡樂當及時今
日忽已過來日非所知有酒且復飲既醉歌令儀

詠逸民十一首

自古逸民多矣意之所至率然成詠聊與同好時
而歌之耳

鳳凰覽德輝奮翅翔千仞矯矯孤竹子求仁斯得仁於
心有不厭視世等埃塵俯仰志不屈又不辱其身聖言
一以宣萬古無緇磷誰言首陽山卓與嵩華鄰采采山
中薇愧爾肉食人

勞生本非情祿仕吾不苟古來畎畝間亦有沮溺叟依
依耦畊心千載思尚友中道世所難狂狷誠足取如何

絕代下相知不忠厚仲尼不復作斯懷向誰道

驅車秣駑馬吾將適齊國聞有魯連子倣儻好奇畫一
談秦師走再說聊城拔功成不受賞高舉振六翮布衣
終其身豈復為世役茫茫千載遠安往訪遺跡躊躇東
海上向風長太息

四時相代謝榮耀何足恃瓜田引新蔓不見桃與李知
士解其會遇坎當復止邵生故秦吏乃亦睹茲理賢哉
感我懷三歎不能已

子真初亦仕歲晚乃逃之區區南昌尉上疏忘其卑忠
言不見用耿耿當告誰飄然棄妻子終身與世辭抱關
甘貧賤所貴莫我知至今九江瀆清風激羣黎神仙信
茫昧此士獨不疑孤雲無定在逝水何時歸遐思一矯
首悵望無由期

悠悠空山雲泱泱長江流廊廟意不屑山澤聊淹留故
人在天位高步追巢由豈曰子無衣辛苦被羊裘東京
多節義之子乃其尤窮居雖獨善輔世豈不優

汪汪千頃波不為人濁清道周言行表蕩然無得名誰
言牛醫兒乃是人中英當時無間言後世流德聲思之
不可見使我鄙吝萌淳風久已漓此意豈復存時無君
子者雖賢寧見稱

南州有高士食力事耕稼優游聊卒歲不矯亦不隘大
木行欲顛絳纚豈足賴何為諸老翁栖栖不遑舍斯言
非無見明哲自高邁誰能縣一榻待子來稅駕

鹿門何亭亭下有避世賢鳳雛隱中林卧龍蟠其淵一

朝起高翔斯人獨深潛功名不可為我志久已安一聞
耆舊傳使我心悠然

黃鵠羽翼長一舉思千里幼安本中原乘桴走東海舉
世方尚同遠引存吾志流風漸異俗敦禮化鄰鄙子魚
平生友胡乃不相委

塵事非所便田園久見招歸來三徑中蔚蔚長蓬蒿雖
有荷鋤倦濁酒且陶陶茫茫大化中委運將焉逃唐虞
去已遠由來非一朝粲粲霜中菊采采忘其勞

歲莫和剛父雜詩四首

窮陰結嚴寒玄景閱微陽
蘭蕭同憔悴隱惻我中腸
美人彈玉琴繼之歌清商
絃急聲未已知子意獨長
陽春時未至此曲徒悲傷

美玉處荆山林木生光輝
采之獻凡目棄置亦其宜
如何和氏子涕泣有餘悲
古來賢達人
不為毀譽移被褐懷至寶
寧懼不我知待賈未能信
韞藏誠可師

驚飈吹白日流光忽蹉跎
登山采眾芳荆榛一何多
迷

途幸未遠迴車且委蛇黃鵠志四海雀鷃將如何
肥馬黃金鞍輕裘華且鮮竭來從橫馳意氣何翩翩朝
為人所慕夕已為世憐此道固應爾禍福非虛言生當
稱善人死當諡為賢勿羨夸毗子狂馳終百年

贈道隆上人

辟俗無所之步尋招提遊顏垣蔽蓬艾破屋壞不修老
僧俗念淨靜坐百不憂浮雲有逸態止水無急流乃知
我輩人苦受世累囚竭來得此地稍覺心休休窗前幾

藂菊青蕊亦已稠愛之不忍采留作山房秋何當移四
松伴汝成清幽南岡與北嶺路近頗易求他年風雨夜
來聽龍吟愁

遊南山憇山下人家和人韻

驅馬南山陽下馬望絕巘解衣坐盤桓言就蓬廬偃非
無攀援力興盡自應返天高暄風息木落歲華晚勢阻
乏遐觀趣得心自遠不有君子詞何用杼繾綣

東郊

晨興理孤榜薄言東郊遊清風吹我衣入袂寒颼颼幽
花媚時節弱蔣依寒流山開碧雲斂日出白煙收曠望
得所懷欣然消我憂中流望城郭蔥蔥佳氣稠人生亦
已繁惠養要須周約身不願餘尚恐乏所求且當置勿
念乘化終歸休

春後多陰偶成三首用復無逸來貺

日出晨景澹散髮步中庭仰見濯濯柳春風暢人情茲
晨豈不佳誰能定陰晴人生亦良脆疲勞竟何營萬事

可撥遣舍道焉求成

卧起向北窗一室可棲遲取詩三百篇一一絃歌之古道豈為遠先師不吾欺嘉我有良朋所志共在茲適意聊娛樂過此非所知

仲春忽已過四序隨流波水深不可厲苦雨一何多田園頗在念春事今如何沉憂亦無益言笑復言歌

曉起川上贈友

明發不能寐獨步柳陰中秋色方浩蕩晨光乍曛曠爍

樂川上日蕭蕭樹間風葛巾吹欲墮纖絳已無功感彼
歲月駛悟此人世空悠悠竟何補山林情所鍾終期抗
高志駕言從赤松

遊弁山

我欲到斯境歲月良已深今晨為茲遊疇我夙昔心悠
悠岡坂長慘慘風雲陰微雨迫短日飄然灑衣襟屢欲
還吾駕去意復難任逍遙得所止林竹自蕭森素琴不
須彈山水有清音邈在樊籠外塵想何由侵況懷冥絕

理去此將焉尋他山豈不好聊爾非所欽

二月二日尊經閣望郊外山水二首

朝登西北樓遐景舒我懷熹微晨光動窈窕春增華草木罕悴色山川一何佳悠然斜川意千載與我諧及茲春服成言詠樂無涯此理將不泯棄之良可嗟

日出羣動作鷄犬亦復喧渺渺孤舟發翩翩棲鳥遷先師有明訓政在善利間結髮事詩書於今益可憐况茲去古遠淳風未易還吾行亦聊爾一覽可忘言

次韻舜舉四幕詩

子哲有高志悠然舞雩春接輿諒非狂行歌歸隱淪周
也寔曠士天地視一身去之千載下淵明亦其人歸來
北窗裏勢屈道自伸仕止固有時四子乃不泯九原如
可作執鞭良所欣

春思

春柳黃如鵝春風揚綠波美人在何許忽若阻山阿攀
條弄白日常恐歲蹉跎懷思鬱不舒佳期將奈何良辰

難驟得臨風空浩歌

雜詩

四時更代謝物化常隨之
春華曾幾何歲月忽如茲
嚴風動高林百草具已萎
人生況有役憂患乃其宜
棄捐勿復念出入由化機
安得松喬術邈與世相違

寄題右之此靜軒

卜居無喧寂尚論心所宗
山林苟不靜亦與朝市同
聞君南窗下寄傲樂無窮
曲肱有餘趣戰勝紛華中
好風

從何來吹子庭前松清琴時一彈濁酒尊不空頗恨道
里賒不得往相從人事矧好乖我心何時降

廉山曉行

曳杖行墟曲蒼茫曉色分凝霜被原隰葛屨非昔聞新
松夾道周宿草冒高墳日月迭而逝死生安足云輕舟
沿寒流悵望廉山雲世固不可辟斯人本同羣緬焉心
如結詠言著斯文

奉和本齋先生首夏即事

天道雖不言坐覺四時行
藹藹庭前陰熒熒枝上榮
閒居有真趣曲肱寄餘情
仰視浮雲翔俯聆時鳥鳴
道勝心自怡松喬可齊齡
惜哉無旨酒為公稱兕觥

贈趙虞卿

客從北方來逍遙江湖間
顧影空自愛不見欣戚顏
奕秋去已遠神觀一朝還
惜無雙白壁慰子行路難
翩翩雲中鶴孤高杳難攀
長懷紫霞客引袂入名山

題董元溪岸圖

石林何蒼蒼油雲出其下山高蔽白日陰晦復多雨窈
窕溪谷中遭回入洲渚冥冥猿狖居漠漠鳬鴈聚幽居
彼誰子孰與玩芳草因之一長謠商聲振林莽

贈別瓜爾佳公

驅馬原隰間經時不遑休昔來日在斗今去麥已秋王
事有埤益宴安非所求翩翩晨風翼一舉逝莫留誰令
匏瓜繫自懷離別憂

青青蕙蘭花含英在中林春風不披拂胡能見幽心相

去千里餘會合大江南北席談自古知我一何深此別
雖非遠懷思渺難任公其愛體素尚無金玉音

題舜舉小隱圖

有水清且泚洄洑亂石間樂哉三子者在澗歌考槃流
波牽弱縷輕颺動文竿信無吞舟魚我志匪魴鰈勿言
隱尚小神情有餘閒高士不可見古風何時還

趙村道中

朝出南郭門遙指西山陰馬蹄與石鬬宛轉愁我心溪

谷莽回互寒風振穹林黃葉灑我衣巖泉走哀音淒淒
霜露降窮思浩難任人生亦何為百年成古今華堂昔
燕處零落歸丘岑况復不得保悲來淚沾襟

昔年干戈動兵塵暗三吳長江已無險智勇亦難圖築
壘依平山謀國一何愚楨榦羣林空遺址莽丘墟至今
蓬蒿下猶有白骨枯天陰萬鬼哭慘慘荒山隅興亡自
有數不敢問何如獨憐野菊花立馬為躊躇

奉酬戴帥初架閣見贈

仙人海上來遺我珊瑚鉤晶光奪凡目奇采耀九州自
吾得此寶晝玩夜不休生世勿恨晚及與斯人儔惜哉
無瓊玖可以結綢繆世德日下衰古風向誰求螯眉亦
何有空受衆女仇適俗固所願違已良足憂感子贈言
意再拜涕泗流安得騎騏驎從子以遠遊

吾愛戴安道隱居絕埃塵彈琴聊自娛書畫又絕倫豈
無召我者已矣非所欣昔我道剡中山川自清新是時
夜雪霽懷哉見其人常欲以暇日慷慨為寫真之子有

祖風千里響然臻我從蘇李後敢言筆墨神坐之盤石
上俗物不得親微君動高興此意當誰陳

桐廬道中

歷歷山水郡行行襟抱清兩崖束滄江扁舟此宵征卧
聞灘聲壯起見渚煙橫西風林木淨落日沙水明高旻
衆星出東嶺素月生舟子櫂歌發含詞感人情人情苦
不遠東山有遺聲豈不懷燕居簡書趣期程優游恐不
免驅馳竟何成我生悠悠者何日遂歸耕

張詹事遂初亭

青山繚神京佳氣溢芳甸林亭去天咫萬狀爭自獻年
多嘉木合春晚餘花殿雕闌留戲蝶藻井語嬌燕退食
鳴玉珂友于此終宴鐘鼓樂清時衣冠集羣彥朝市塵
得侵圖書味方遠紛華雖在眼道勝安用戰初心良已
遂雅志由此見何事江海人山林未如願

送周正平學士致仕還里

關吏晨啓門僕夫戒首途祖道京城南喜色動闔閭仕

宦非徒榮出處貴合義公今雖未耄進退有餘地高蹈
激流俗清風聳朝廷增秩仍繼祿聖明優老成逍遙桑
梓間年高德彌邵紅顏醉春酒白髮照晴昊兩疏真勇
決四皓甘隱淪漢史不專美古今凡幾人青牛當南游
紫氣已先路我欲強著書懷哉未能去

寄鮮于伯幾

廊廟不乏才江湖多隱淪之子稱吏隱才高非衆鄰脫
身軒冕場築屋西湖濱開軒弄玉琴臨池書練裙雷文

粲周鼎鹿鳴娛佳賓圖書左右列花竹自清新賦詩凌
鮑謝往往絕埃塵我生少寡諧一見夙昔親誤落塵罔
中四度京華春澤雉歎畜樊白鷗誰能馴

送程子充運副之杭州

鹽為生民食日用猶水火雖非饑所急一日無不可但
令商賈便那復愁國課數年人壞法貪欲肆偏頗利多
歸私室民始受鹽禍爾來又計口強致及包裹摧酷窮
滴瀝征商劇遮邏東南民力竭此事非細瑣朝家更政

化選擇堪負荷君為尚書郎精白色瑳瑳明當戒行李
往理吳越柁祝君無別語編戶要安妥湖山多勝處亦
可供宴坐談笑尊俎間佳聲滿江左

贈茅山梁道士

名山標句曲秀嶺蔚層雲層雲散浩彩中有三茅君度
世三千秋流芳浩無垠丹光耀朱陽琴心傳玉文司命
播萬物發蒙導人羣學道得曠士采真遺塵氛贈我書
一編清謠吐奇芬筆耕亦已勤寸田要鋤耘靈臺聳絳

闕黃雲覆氤氲內觀神自照衆言一何紛平生山林意
獨往乃所欽攀援桂樹枝采擷芝蘭薰靜與木石居遊
則侶麋麇松栢無冬夏烟霞自夕昕軒冕或桎梏綺語
徒羶輦大道返爾朴至哉吾師云冥冥紫霞想湛言久
不聞聆我歌洞章判然仙凡分

罪出

在山為遠志出山為小草古語已云然見事苦不早平
生獨往願丘壑寄懷抱圖書時自娛野性期自保誰令墮

塵網宛轉受纏繞昔為海上鷗今如籠中鳥哀鳴誰復
顧毛羽日摧槁向非親友贈蔬食常不飽病妻抱弱子
遠去萬里道骨肉生別離丘隴缺拜掃愁深無一語目
斷南雲杳慟哭悲風來如何訴穹昊

次韻齊彥學士中秋雨後翫月

卧疴媿微官俯仰百憂集安知中秋至但見明月出蕭
蕭雨新已涼氣澄霽夕青旻羅疎星燦若珠與壁小蟲
鳴草根萬物皆自適而我獨何為矯首望南北愁來無

端倪撥去終不釋人生莫不樂杯酒會鄰戚高歌雜清
唱起舞戛鳴瑟閉戶且復眠空尊何由酌

秋日錦櫻為繼卿作

灼灼庭下花霜餘發春妍衆卉方具腓穠芳獨嫣然主
人遠方來一笑清尊前植物豈無情有開容必先造化
寓深意嘉與後人傳

聽姜伯惠父彈琴摩阮

姜子早聞道澹然遺世榮藝花有生意焚香無俗情時

抱琴與阮彈作松風聲疇昔江湖間久已知子名安知
十年後一笑成合并是邦山水秀照人肌骨清願子石
泉上為鼓一再行因之洗我耳遂欲濯塵纓

題洞陽徐真人萬壑松風圖

謾謾松下風悠悠塵外心以我清淨耳聽此太古音逍
遙萬物表不受世故侵何年從此老辟穀隱雲林

自釋

君子重道義小人貴功名天爵元自尊世紛何足榮乘

除有至理此重彼自輕青松與蔓草物情當細評勿為蔓草蕃願作青松貞

禱雨龍洞山

蒼山如犬牙細路入深谷絕壁千餘仞上有凌雲木陰崖不受日洞穴自成屋蕭森人跡少蒼蔚獸攸伏雲林互隱映澗道相迴復翔禽薄穹霄鳴鳥響岩曲臨橋濯清颼汲井漱寒玉神物此淵潛愆陽有祈祝風瀉慙善教吏懦恥厚祿慙懷塵外想獨往疑有梧過幽難久居

濟勝乏高躅策馬尋故蹊歸樵相追逐

送石仲璋

霜風何淒厲蘭蕭同枯萎念此鼻為酸惻愴中心悲由
來無醜好衆女嫉蛾眉數畧困巨魚鹽車厄天騏况復
值怨仇貝錦成禍機俯首無所訴菹醢聽所為何非知
已者雖死誰明之君子有行役後會在何時欲別不敢
往瞻望涕漣沍援筆撫我心為公吐此詞

題桃源圖

戰國方忿爭羸秦復狂怒冤哉魚肉民死者不知數斯
人逃空谷是殆天所恕山深無來逕林密絕歸路艱難
苟生活種蒔偶成趣西鄰與東舍鷄犬自來去熙熙如上
古無復當世慮安知捕魚郎延緣至其處遙遙千載後
緬想增慨慕即今生齒繁險絕悉開露山中無木客川
上靡漁父雖懷隱者心桃源在何許況茲太平世堯
舜方在御干戈久已戢老幼樂含哺田疇畢耕耨努力
勤藝樹母為問迷津窮探事高舉

題歸去來圖

生世各有時出處非偶然淵明賦歸來佳處未易言後人多慕之效顰惑媼妍終然不能去俛仰塵埃間斯人真有道名與日月懸青松卓然操黃華霜中鮮棄官亦易耳忍窮北窗眠撫卷三歎息世久無此賢

題李伯時元祐內殿五馬圖黃太史書其齒毛五馬何翩翩蕭灑秋風前君王不好武芻粟飽豐年朝入閭闔門莫秣十二閑雄姿耀朝日滅沒走飛煙顧盼

增意氣群龍戲芝田駿骨不得朽託茲書畫傳誇哉昭
陵石歲久當頽然

酬滕野雲

滕君本臞儒肝膈足清氣賦詩多秀句往往含古意大
誇江山美一洗塵土翳平生有詩癖得句時自憙耒耜
荒蕪甚枯澀常內媿錦綉忽墮前令我喜不寐功名亦
何有富貴安足計唯有百年後文字可傳世雲谿春水
生歸志行可遂閒吟淵明詩靜學右軍字但恐君未聞

金
五
二
卷二
書成無由寄

述太傅丞相巴延功德

興廢本天運輔成見人庸輿地久以裂車書會當同先
帝昔在御如日行虛空六合仰照耀一方顧顓蒙授鉞
得人傑止戈代天工鐵馬浮渡江坐收破竹功草木紛
震動山川變鴻濛地利不復險金城何足攻市靡易肆
憂兵無血刃紅孰能年歲間我國究始終老稚感再生
遺黎忘困窮歸來一不取匹馬走北風九域自此一益

見聖世崇大哉先帝仁允矣丞相忠嗟我始弱冠弗獲
拜此公作頌歌元勲因之寫吾衷

送文子方調選雲南

我友文子方其人美如玉高談動卿相惠利厚風俗文
章多古意清切綠水曲紛紛鳬鷺群見此摩霄鵠今當
使西南萬里道邛蜀銓衡非細事賢俊要甄錄遠人待
子來饑者望菽粟賢勞亦常事但恐期程促馬嘶晨當
行草長春正綠執手臨岐路使我空躑躅

吳真人盧溝雨別圖

驅馬上河梁執手遠別離
遠別數千里臨分各相思
山川一何悠去去勿復遲
高堂有雙親黃髮映龐眉
還家拜堂下置酒作兒嬉
却歸見天子忠孝兩無虧
人生如公少致身貴及時
此行將未已親壽當期頤

高氏謹節堂

先聖有明訓見諸庶人章
少小誦習之白首不敢忘
高子躬孝弟養親在高堂
蕭公三大字岌岌端且莊
對之

銘座右凜然肅冠裳謹身用始節節用乃無荒斯言非
虛語旨遠味自長守此期勿失善積有餘慶

題耕織圖二十四首奉懿旨撰

耕正月

田家重元日置酒會鄰里小大易新衣相戒未明起老
翁年已邁含笑弄孫子老嫗憇且慈白髮被兩耳杯棹
且羅列飲食致甘旨相呼團樂坐聊慰衰莫齒田硯藉
人力糞壤要鋤理新歲不敢閒農事自茲始

二月

東風吹原野地凍亦已消
早覺農事動荷鋤過相招
遲朝日上炊煙出林梢
土膏脉既起良耜利若刀
高低徧翻壑宿草不待燒
幼婦頗能家井臼常自操
散灰緣舊俗門徑環周遭
所冀歲有成殷勤在今朝

三月

良農知土性肥瘠有不同
時至萬物生芽蘗由地中
秉耒向畝畝忽徧西與東
舉家往于田勞瘁在爾農
春雨

及時降被野何濛濛乘茲各布種庶望西成功培根利
秋實仰天望年豐但使陰陽和自然倉廩充

四月

孟夏土加潤苗生無近遠漫漫冒淺陂芄芃被長阪嘉
穀雖已植惡草亦滋蔓君子與小人並處必為患朝朝
荷鉏往薅耨忘疲倦旦隨鳥雀起歸與牛羊晚有婦念
將饑過午可無飯一飽不易得念此獨長歎

五月

仲夏苦雨乾二麥先後熟南風吹隴畝惠氣散清淑是
為農夫慶所望實其腹沽酒醉比鄰語笑聲滿屋紛然
收穫罷高廩起相屬有周成王業后稷播百穀皇天貽
來牟長世自茲卜願言仍歲稔四海盡蒙福

六月

當晝耘水田農夫亦良苦赤日背欲裂白汗灑如雨
匍匐行水中泥淖及腰膂新苗抽利劒割膚何痛楚夫耘
婦當饁奔走及亭午無時暫休息不得避炎暑誰憐萬

民食粒粒非易取願陳知稼穡無逸傳自古

七月

大火既西流涼風日淒厲古人重稼穡力田在匪懈郊
行省農事未黍何旆旆碾以他山石玉粒使人愛大祀
須粢盛一一稽古制是為五穀長異彼稊與稗炊之香
且美可用享上帝豈惟足食人一飽有所待

八月

白露下百草莖葉日紛萎是時禾黍登充積徧都鄙在

郊既千庾入邑復萬軌人言田家樂此樂誰可比租賦
以輸官所餘足儲峙不然風雪至凍餒及妻子優游茅
簷下庶可以卒歲太平元有象治世乃如此

九月

大家饒米麪何啻百室盈縱復人力多春磨常不停激
水轉大輪磴碾亦易成古人有機智用之可厚生朝出
連百車莫入還滿庭勾稽數多少必假布算精小人好
爭利晝夜心營營君子貴知足知足萬慮輕

十月

孟冬農事畢穀粟既已藏彌望四野空藁秸亦在場朝
廷政方理庶事和陰陽所以頻歲登不憂旱與蝗置酒
燕鄉里尊老列上行肴羞不厭多魚羔復烹羊縱飲窮
日夕為樂殊未央禱天祝聖人萬年長壽昌

十一月

農家值豐年樂事日熙熙黑黍可釀酒在牢羊豕肥東
鄰有一女西鄰有一兒兒年十五六女大亦可笄財禮

不求備多少取隨宜冬前與冬後婚嫁利此時但願子孫多門戶可扶持女當力蠶桑男當力耘耔

十二月

一日不力作一日食不足慘澹歲云莫風雪入破屋老農氣力衰偃僂腰背曲索綯民事急晝夜互相續飯牛欲牛肥芟藁亦預蓄塞驢雖劣弱挽車致百斛農家極勞苦歲豈恒稔熟能知稼穡艱天下自蒙福

織正月

正月新獻歲最先理農器女工並時興蠶室臨期治初
陽力未勝早春尚寒氣窗戶當奧密勿使風雨至田疇
耕耨動敢不修耒耜經冬牛力弱相戒勤飯飼萬事非
預備倉卒恐不易田家亦良苦捨此復何計

二月

仲春凍初解陽氣方滿盈旭日照原野萬物皆欣榮是
時可種桑插地易抽萌列樹徧阡陌東西各縱橫豈惟
籬落間採葉憚遠行大哉皇元化四海無交兵種桑日

以廣彌望綠雲平匪惟錦綺謀祇以厚民生

三月

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶饑
當採桑何暇事遊遨田時人力少丈夫方種苗相將挽
長條盈筐不終朝數口望無寒敢辭終歲勞

四月

四月夏氣清蠶大已屬眠高首何昂昂蛾眉復娟娟不

憂桑葉少徧野如綠烟相呼攜筐去迢遞立遠阡梯空
伐條枚葉上露未乾蠶饑當早歸秉心靜以專飭躬修
婦事僊勉當盛年救忙多女伴笑語方喧然

五月

五月夏已半谷鶯先弄晨老蠶成雪繭吐絲亂紛紜伐
葦作薄曲束縛齊榛榛黃者黃如金白者白如銀爛然
滿筐筐愛此顏色新欣欣舉家喜稍慰經時勤有客過
相問笑聲聞四鄰論功何所歸再拜謝蠶神

六月

釜下燒桑柴取繭投釜中纖纖女兒手抽絲疾如風
田家五六月綠樹陰相蒙但聞縑車響遠接村西東
旬日可經絹弗憂杼軸空婦人能蠶桑家道當不窮
更望時雨足二麥亦稍豐沽酒及時飲醉倒嫗與翁

七月

七月暑尚熾長日弄機杼頭蓬不暇梳揮手汗如雨
嚶嚶時鳥鳴灼灼紅榴吐何心娛耳目往來忘偃僂
織為

機中素老幼要紉補青燈照夜梭蟋蟀窗外語辛勤亦
何有身體衣幾縷嫁為田家婦終歲服勞苦

八月

池水何洋洋漚麻水中央數日麻可取引過兩手長織
絹能幾時織布已復忙依依小兒女歲晚歎無裳布襦
不掩脛念之熱中腸朝緝滿一籃暮緝滿一筐行看機
中布計日漸可量我衣苟已成不憂天早霜

九月

季秋霜露降凜凜寒氣生是月當授衣有布織未成天
寒催刀尺機杼可無營教女學紡繭舉足疾且輕舍南
與舍北嘒嘒聞車聲通都富豪家華屋貯娉婷被服雜
羅綺五色相間明聽說貧家女惻然當動情

十月

豐年禾黍登農心稍逸樂小兒漸長大終歲荷鋤耰目
不識一字每念心作惡東鄰方迎師收拾令入學後月
日南至相賀因舊俗為女裁新衣修短巧量度龜手事

塞向庶禦北風虐人生真可歎至老長力作

十一月

冬至陽來復草木漸滋萌君子重其然吾道自此亨父
母坐堂上子孫列前榮再拜稱上壽所願百福并人生
屬明時四海方太平民無札瘥者厚澤敷羣情衣食苟
給足禮義自此生願言興學校庶幾教化成

十二月


忽忽歲將盡人事可稍休寒風吹桑林日夕聲颼颼墻

南地不凍墾掘為坑溝斫桑埋其中明年芽早抽是月
浴蠶種自古相傳流蠶出易脫殼絲纈亦倍收及時不
努力知有來歲不手凍不足惜冀免號寒憂

松雪齋集卷二

謹案卷一七頁前四行拜特穆爾舊作伯帖木兒
今改

卷二十三頁後四行瓜爾佳舊作夾谷今改後倣
此 二十二頁後二行巴延舊作伯顏今改後
倣此



總校官庶吉士臣張能照

校對官編修臣裴謙

謄錄監生臣劉銓瑛